

佛说盂兰盆经

西晋三藏法师竺法护 译



南無本師釋迦牟尼佛

说明

本简体校正版《佛说盂兰盆经》电子书，是根据清制《乾隆大藏经》第 39 册、第 0299 部，大乘五大部外重译经部，西晋三藏法师竺法护译《佛说盂兰盆经》影印本校正的，特此说明。

仁慧草堂

二〇一七年五月

● 起诵仪

香赞

(一遍)

炉香乍爇. 法界蒙薰. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

开经偈

(一遍)

无上甚深微妙法 百千万劫难遭遇
我今见闻得受持 愿解如来真实义

佛说盂兰盆经

西晋三藏法师竺法护 译

闻如是：一时，佛在舍卫国·祇树·给孤独园。

大目犍连，始得六通，欲度父母，报乳哺之恩，即以道眼，观视世间，见其亡母，生饿鬼中，不见饮食，皮骨连立。目连悲哀，即以钵盛饭，往饷其母。母得钵饭，便以左手障钵，右手拈食，食未入口，化成火炭，遂不得食。目连大叫，悲号涕泣，驰还白佛，具陈如此。

佛言：“汝母罪根深结，非汝一人，力所奈何。汝虽孝顺，声动天地，天地神祇、邪魔外道、道士、四天王神，亦不能奈何。当须十方众僧威神之力，乃得解脱。吾今当说，救济之法，令一切难，皆离忧苦。”

佛告目莲：“十方众僧，七月十五日，僧自恣时，当为七世父母，及现在父母，厄难中者，具饭百味五果；汲灌盆器、香油鋸烛、床敷卧具，尽世甘美，以著盆中，供养十方大德众僧。当此之日，一切圣众，或在山间禅定；或得四道果；或在树下经行；或六通自在教化声闻、缘觉；或十地菩萨大人权现比丘，在大众中，皆同一心，

受钵和罗饭。具清净戒圣众之道，其德汪洋。其有供养此等自恣僧者，现世父母，六亲眷属，得出三塗之苦，应时解脱，衣食自然。若父母现在者，福乐百年；若七世父母，生天自在，化生入天华光。”

时，佛敕十方众僧，皆先为施主家咒愿，愿七世父母，行禅定意，然后受食。初受食时，先安在佛前塔寺中。佛前众僧咒愿竟，便自受食。

时，目连比丘及大菩萨众，皆大欢喜。目连悲啼泣声，释然除灭。是时，目连母即于是日，得脱一劫饿鬼之苦。

目连复白佛言：“弟子所生母，得蒙三宝功德之力，众僧威神之力故。若未来世一切佛弟子，亦应奉盂兰盆，救度现在父母，乃至七世父母，为可尔否？”

佛言：“大善快问！我正欲说，汝今复问。善男子，若比丘、比丘尼、国王、太子、大臣、宰相、三公、百官、万民庶人，行慈孝者，皆应先为所生现在父母、过去七世父母，于七月十五日、佛欢喜日、僧自恣日，以百味饮食，安盂兰盆中，施十方自恣僧，愿使现在父母，寿命百年，无病无一切苦恼之患，乃至七世父母，离饿鬼苦，

生人天中，福乐无极。是佛弟子修孝顺者，应念念中，常忆父母乃至七世父母，年年七月十五日，当以孝慈，忆所生父母，为作盂兰盆，施佛及僧，以报父母长养慈爱之恩。若一切佛弟子，应当奉持是法。”

时，目连比丘、四辈弟子，欢喜奉行。

《佛说盂兰盆经》卷终

佛说盂兰盆经

● 结诵仪

补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

报父母恩咒

(四十九遍)

南无密栗多. 哆婆曳. 娑诃.

三皈依

(一遍)

自皈依佛，当愿众生，体解大道，发无上心。
自皈依法，当愿众生，深入经藏，智慧如海。
自皈依僧，当愿众生，统理大众，一切无碍，和南圣众。

南無本师释迦牟尼佛 (合掌三称)

回向偈

(一遍)

诵经功德殊胜行 无边胜福皆回向
 普愿沉溺诸有情 速往无量光佛刹
 十方三世一切佛 一切菩萨摩诃萨
 摩诃般若波罗蜜

回向偈

(一遍)

愿以此功德 庄严佛净土
 上报四重恩 下济三途苦
 若有见闻者 悉发菩提心
 尽此一报身 同生极乐国



此咒置经书中可灭误跨之罪

南无护法韦驮尊天菩萨

